

陝縣志卷十五

歐陽珍編次

名宦

說見職官

周

召公奭與周同姓姬氏周武王滅紂封召公於北燕在成王時入為太保與周公分陝而治自陝以西召公主之官無失職甚得民和巡行鄉邑偶憩棠樹下及公卒而民人懷思不忍伐其樹作甘棠之詩歷代有專祠為名宦之首焉

西漢

馮揚魏郡人宣帝時為宏農太守多善政有子八人皆為二千石趙魏間榮之號萬石君祀名宦

張寬為宏農太守二嶠地險多盜寬以誠諭宿盜盡格百姓樂之祀名宦

蕭咸字次君東海蘭陵人太傅望之子也舉茂才為好時令遷宏農太守所居有治迹數增秩賜金官至大司農

陝縣志

卷十五

翟義上蔡人丞相方進子為宏農太守政有父風後改東郡起兵討王莽不克死之祀名宦

金欽日磾族曾孫也舉明經遷宏農太守著威名徵為大司徒後以家世忠孝帝友重之封都城侯

東漢

劉興漢宗室建武初試守緱氏令有明略善聽訟甚得名稱遷宏農太守時宏農縣吏張申有罪興收申按論郡中震慄年旱分遣文學循行屬縣理冤獄宥小過應時甘雨降澍

景丹字孫卿馮翊櫟陽人拜驃騎大將軍建武二年封櫟陽侯陝賊蘇况攻破宏農生獲郡守丹時病帝以其舊將欲令強起領郡事乃夜召入謂曰賊迫近京師但得將軍威重臥以鎮之足矣丹不敢辭乃力疾拜命將營到郡十餘日薨

殷肅宏農功曹史東平王蒼以至戚為驃騎將軍輔政開東閣延英雄班固奏記說蒼曰宏農功曹史殷肅達學洽聞才能絕倫誦詩三百奉使專對如蒙徵納以輔高明此山梁之秋夫子所為歎也昔卞和獻寶以離斷趾靈均納忠終於沉身而和氏之璧千載垂

光屈子之篇萬世歸善願將軍隆照微之明信日昃之聽少屈威神咨嗟下問令塵埃之中永無荆山汨羅之恨

劉 昆字桓公東昏人梁孝王之後建武初由江陵令遷宏農太守先是崑澗多虎行旅不通昆爲政三年仁化大行虎皆負子渡河徵爲光祿勳帝召問曰前在江陵反風滅火後守宏農虎北渡河行何德政而致是耶對曰偶然耳帝嘆曰長者之言令史書諸册祀名宦

張 元字君夏河內河陽人少習顏氏春秋兼通數家法建武初舉明經補宏農文學遷陳倉縣丞清淨無欲專心經書方其講問乃不食終日及有難者輒爲張數家之說令擇從所安諸儒皆伏其多通著錄千餘卷

蔡 元字叔陵汝南南頓人學通五經門徒數千人徵辟並不就順帝時徵拜議郎講論五經異同甚合帝意遷侍中出爲宏農太守卒於官

趙 典字仲經成都人少篤行隱約博學經書弟子自遠方至襲爵爲廚亭侯出爲宏農太守遷太常朝廷每有疑議輒咨問之得賞賜分給諸生之貧者終長樂少府諡曰獻尹翁歸字子凡河東平陽人舉孝廉爲緱氏尉歷遷宏農都尉終右扶風太守課嘗爲三

陝縣志

卷十五

輔最及卒家無餘財天子賢之賜黃金百觔以奉其祭祀

杜 衆宏農五官掾傷李雲以忠諫獲罪上書願與雲同日死並下獄雲衆皆死獄中皇甫規字威明安定朝那人永康初爲宏農太守在郡有仁聲延熹中以黨人自附時人稱其賢能焉祀名宦

王 宏字長文太原祁人初爲宏農太守郡中有事宦官買爵位者雖至二千石皆掠考收捕殺數十人以威著終右扶風祀名宦

按兩漢政治最爲近古西漢多循良東京重節義卽其一二特行皆足爲百世之師後世敷陳滿紙麗藻多而真氣漓矣

魏

何 楨字元幹廬江人有文學器幹容貌甚偉爲宏農太守薦隱士潁川胡昭俊終尙書光祿大夫

賈 逵字梁道河東襄陵人操征馬超過宏農曰此西道之要以逵領宏農太守召見計事大悅謂人曰使天下二千石悉如賈君吾復何憂進封陽里亭侯諡曰肅

杜 恕字務伯京兆杜陵人畿之子也嗣豐樂亭侯出爲宏農太守寬和有惠愛不結交

援專心向公侍中辛毗等器重之

孟 康字公休安平人爲散騎侍郎出爲宏農太守領典農校尉清已奉職嘉善而矜不能省息獄訟緣民所欲因而利之郡領吏二百餘人涉春遣休常四分遣一事無宿諾時出按行皆豫敕督郵平水不得令屬官遣人探候修設曲敬又不欲煩損吏民常豫敕吏卒行各持鎌所在刈馬草不止亭傳露宿樹下又所從常不過十餘人郡當道路其諸過賓客自非公法無所出給若知舊造之自出於家吏民稱歌焉徵入爲中書令後轉爲監

按當三國之時征戰不休而有吏能撫民如此所以得稍生息不至糜爛泯滅異於後世軍閥專恃武力以恣行威虐者也

令狐邵字孔叔太原人以丞相主簿出爲宏農太守所在清如冰雪妻子希至府省舉善而教恕以待人不好獄訟與下無忌時郡無知經者因設文學由是宏農學業勃興終虎賁中郎將

裴 虞宏農太守起義討河間王斬馬瞻梁邁

陝 縣 志

卷十五

三

王元德劉聰時宏農太守謀附劉裕以圖興復事泄被殺

桓 延宏農太守劉聰長驅至宜陽延許降復夜襲之聰大敗而還

按晉室既東五胡雲擾而二人不甘心附外族以興復宗國爲念皆有志之士陶侃祖逖之亞也

荀 顏爲宏農太守有惠政

郭 璞字景純河南人爲宏農太守遷著作郎有政聲

陶仲山爲宏農太守有政績人樂其業

按三人爲政惜史不詳載但古人不虛諛其言自可取信觀景純他日能抗王敦以死是必有善政之實卽荀陶二人可推矣

北魏

崔 寬字景仁武城人爲宏農太守襲爵武陵公陝城鎮將二嶺地險民多寇劫寬性滑稽誘結豪右宿盜魁帥與相交結傾衿待遇不逆細微莫不感其意時官無祿力惟取給於民寬善撫納招致禮遺大有受取而與之者無恨又宏農出漆蠟竹木之饒路與南通販貿來往家產豐富而百姓樂之諸鎮之中號爲能政及解政還京民多迫戀詣闕上章

三百餘人

按元魏以胡人入主中國紀綱不修故寬得自行其政與奸豪爲市貪而不至於虐其民猶相與安焉未可以爲法也

傅 永字修期清河人除恆農太守非心所樂時中山王英東征鐘離表請永求以爲將朝廷不聽永每言曰馬援充國竟何人哉吾獨白首見拘此郡年踰八十猶能馳射盤馬奮稍常諱言老每自稱六十九孝文帝嘆曰上馬能擊賊下馬作露布惟傅修期爾

劉道斌武邑灌津人宣武時爲恆農太守修立學館建孔子廟堂圖畫形像去郡後故吏追思之復立道斌形於孔廟之西而拜謁焉諡曰康

按道斌當南北分立之際而獨能興學尊孔使北魏亦染華風而變其侏僂之習其卓識固有大過人者哉

王思政太原祁人鎮宏農東魏來寇思政守禦有備乃收軍還以全城功授驃騎大將軍復命鎮宏農於是修城郭起樓櫓營農田積芻秣凡可以守禦者皆具焉宏農之有備自思政始也

蘇 椿字令欽武功人性廉慎沈勇有決斷大統四年以西夏州長史除帥都督行宏農

陝縣志

卷十五

四

郡事椿當官強濟大小之政必盡忠恕特爲太祖所知後加爲大都督除武功郡守後爵爲列侯

趙 昶字長舒天水南安人也少聰敏有志節弱冠以材力聞魏北中郎將高干鎮陝以昶爲長史中軍都督周文平宏農擢爲相府典籤

王 羆字熊羆京兆霸城人魏太和中除殿中將軍稍遷雍州別駕清廉疾惡勵精公事刺史崔亮深器之梁人寇硤石亮爲都督南討啟羆爲長史及剋硤石羆功居多

按王思政王羆皆以善戰著名而史載其預籌守備勵精公事當亂離之世夫亦不容浪戰可謂善濟時用者矣

北周

李 遠字萬歲隴西成紀人魏建東宮授太子少傅轉少師後授都督義州宏農等二十一防諸軍事遠善綏撫有幹略守戰之備無不精銳周孝閔帝踐祚復鎮宏農

長孫儉代人天和初轉陝州總管七州諸軍事陝州刺史本名慶明周文帝謂儉曰名實須相稱尙書志安貧素可改名儉以彰雅操追封鄗國公

皇甫璠字景瑜安定三水人徙居京兆保定中以隴右總管府司馬轉陝州總管府長史

徵拜蕃部中大夫璠性和平小心奉法安分守志恆以清白自處當時號爲善人以隨州刺史卒諡曰恭

郭賢字道因趙興陽州人大統中以伏波將軍從王思政鎮宏農授使持節行義州事當州都督轉行宏農郡事賢質直有算略思政甚重之禦邊之謀多與賢參決保定三年以安州刺史轉陝州刺史天和元年卒于位贈少保甯尉朔三州刺史諡曰節

馮遷字羽伐宏農人少修謹有幹能爲宇文護府司錄性質直小心畏慎兼明練時事善于斷決每校閱文書孜孜不倦以此甚爲護委任後授陝州刺史遷本寒微不爲時輩所重一旦刺舉本州惟以謙恭接待鄉邑人無怨者復入爲司錄累遷小司空子恕位儀同三司

按宇文周時用蘇綽爲政頗講究吏治一洗北胡野蠻之俗如馮遷者蓋亦當時之俊彥而又刺舉本州能以謙恭罕怨其賢矣哉

于翼字文若代人周宜陽總管除陝州刺史大軍東討翼自陝入徑到洛陽洛州刺史獨孤承業開門降河南九州三十鎮一時俱下襄城人庶喜見翼並壺漿迎道左

鄭道邕字孝穆滎陽開封人武成五年以虞州刺史轉陝州刺史皆有政績入爲司空卒

陝縣志

卷十五

五

諡曰貞

梁昕字元明安定烏氏人陝州總管府長史性溫裕有幹能歷官內外咸著能稱

杜叔毗字子弼其先京兆杜陵人徙居襄陽晉公宇文護辟爲中外府樂曹參軍遷陝州刺史後從衛國公直南討軍敗爲陳人所擒陳人將降之叔毗辭色不撓遂被害

庾信字子山南陽新野人周孝閔帝踐祚封臨清縣子除司水下大夫出爲宏農郡守信爲政簡靜吏人安之有文集二十卷

隋

楊智積隋宗室大業七年授宏農太守委政僚佐清淨自居及楊玄感作亂自東都引軍而西智積謂官屬曰玄感聞大軍將至欲西圖關中若成其計則根本固矣當以計縻之使不得進不出一旬自可擒耳及玄感軍至城下智積登陴嘗辱之玄感怒甚急攻之城門爲賊所燒智積乃更益火賊不得入數日宇文述等援軍至合擊敗之

長孫仁大業時詔令檢校河南郡陝縣令事於時玄感初誅餘燼尙梗三嶠谷口心膂所寄仁公忠體國弗讓而行至郡布政威惠兼舉吏服民悅訟息刑清效逆之徒討無遺類事迄聞奏入朝

見孟津金石志

唐

張士貴虢州盧氏人本名忽肆彎弓百五十斤左右射無空發隋大業末起爲盜攻剽城邑當時患之號忽肆賊高祖移檄招之士貴卽降拜右光祿大夫從征伐有功賜爵新野縣公又從平洛守虢州刺史帝曰顧令卿衣錦晝游耳進封虢國公右屯衛大將軍貞觀七年爲龔州道行軍總管破反獠還太宗聞其冒矢石先登勞之曰嘗聞以忠報國者不顧身於公見之累遷左領軍大將軍顯慶初卒贈荊州都督陪葬昭陵

崔善爲貝州武城人貞觀初爲陝州刺史時議戶狃地狹者徙寬鄉善爲奏畿內戶衆而丁壯悉籍府兵若聽徙皆在關東虛近實遠非經通計詔可歷大理司農二卿坐與少卿不平出爲秦州刺史卒贈刑部尙書諡曰忠

許紹字嗣宗安州人與高祖同學大業末繇夷陵太守歸國授陝州刺史蕭銑遣楊道生圍陝紹擊走之制書褒美進譙國公祀名宦

杜如晦字克明杜陵人少英爽以風流自命內負大節臨機輒斷太宗爲秦王時引爲府兵曹參軍徙陝州總官府長史時府屬多外遷王患之房玄齡曰去者雖多不足吝如晦王佐才也大王若終守藩無所事晦必欲經營四方舍如晦無共功者因表留幕府終爲

陝縣志

卷十五

六

有唐名相

蘇世長武功人歷陝州長史拜諫議大夫時帝欲獵諫之不聽後預宴披香殿曰此煬帝作也何雕麗至此帝曰卿好諫似直然詐也顧以我所作爲煬帝對曰天下方厭隋侈以歸有道宜刈淫奢復樸素乃雕飾如此耶帝咨重其言

姜師度魏人中宗時爲陝州刺史太原倉水陸運所湊轉屬諸河師度使依高爲廕而注米于舟以故人不勞師度喜渠漕所至繇役紛紜不能皆便然所就必爲後世利是時太史令傅孝忠以知星顯時爲語曰孝忠知仰天師度知相地嘲所嗜也

孫伏伽武城人由治書侍御史太宗考第羣臣以爲第一曰若伏伽者可謂忠直餘人猶踵弊風俛首而已豈朕所望後除爲陝州刺史在職有聲稱祀名宦

韋承慶字延休性謹畏事繼母篤孝神功時豫虢二州刺史有善政
韋宏景鄭州陽武人元和間陝虢觀察使有治效百姓懷之祀名宦

韋 岳萬年人永淳間歷陝虢二州刺史著聲績

按韋氏三人僅有政績而不著其實史筆亦太簡矣

長孫操字元節武德間爲陝東道大行臺城中無井開廣濟渠引水入城以代汲百姓利

焉以母喪解長老守闕頌遺愛永徽初以陝州刺史卒贈吏部尚書諡曰安

按此渠時修時廢雖迫於山路崎嶇而建築實可以利民用至今遺蹟猶存可謂萬世永賴矣

畢 構字隆擇偃師人衛同陝三州刺史睿宗嘉構修潔獨行有古人風其治又爲諸使最乃賜璽書袍帶遷吏部尚書

盧 奐滑州人爲陝州刺史玄宗西還次陝嘉其美政題贊於廳事曰專城之重分陝之雄亦既利物內存匪躬斯爲國寶不墜家風終尚書右丞祀名宦

韓 休長安人始應制舉授桃林丞後爲虢州刺史虢於東西京爲近州乘輿經行芻牧旁午休請均賦他郡中書令張說曰免虢而與他州此守臣爲私惠耳休復執論吏自恐忤宰相意休曰刺史幸知民之弊而不救豈爲政哉雖得罪所甘心焉訖如休請

李齊物字道用天寶初擢陝州刺史開砥柱通漕路發重石下得古鐵戟若鏃然銘曰平陸上之詔以名縣卒贈太子太師性苛察少恩喜發人私然廉潔自喜吏無敢欺者忿陝尉裴冕械而折愧之及冕當國除齊物太子賓客世善冕能捐怨云

按歷代治三門者多矣而砥柱之險於今猶然上水船究不可用本地蒿工亦只能下

陝縣志

卷十五

七

門蓋人力不可與地勢爭也

裴耀卿字煥之開元二十一年京師饑帝將幸東都召問所以救人者耀卿請益廣漕運以實關輔詳見大事記

李 麟太宗再從孫歷虢潞二州刺史皆以誠信待物號良吏至德間入相

許景先義興人開元間虢州刺史時帝自擇十三人治行詔宰相諸王御史以上祖道洛濱奏太常樂盛具帛舫水嬉命高力士賜詩帝親書且給紙筆令自賦賣絹三千遺之

李 傑本名務光相州滏陽人少以孝友著爲吏詳敏有治譽先天中進陝州刺史水陸發運使置使自傑始

岑 羲字伯華鄧州棘陽人睿宗朝陝州刺史先爲金壇令與弟長洲令仲翔溧水令仲林皆有治績號江東三岑

岑仲翔羲弟陝州刺史

章 堅萬年人玄宗朝爲陝州刺史開河引渭通漕名廣運潭入爲刑部尚書記名宦

李 泌字元長京兆人幼以才敏聞貞元元年拜陝虢觀察使自集津至三門鑿山開運道十八里避砥柱之險官至宰相封鄴侯祀名宦

衛伯玉少習武藝肅宗朝出鎮陝州行營乾元二年賊將李歸仁以騎五千入寇伯玉與戰強子坂破之獲馬六百匹爲神策軍節度使思明遣子朝義夜襲陝將動京師伯玉迎擊破之於永甯加特進封河東郡公廣德元年代宗幸陝以伯玉有幹略可方面大事乃拜荆南節度使進封城陽郡王

李 濬虢州刺史以誠信號良吏

彭 隨宏農太守居官守法人多蒙惠

盧懷慎宏農太守有清譽

崔 郾字廣略貝州武城人敬宗朝以禮部侍郎出爲陝州觀察使先是上供財乏則奪吏奉助輸歲率八十萬郾曰吏不能贍私安暇恤民吾不能善治安得自封卽以府常費代之又詔賦粟輸大倉者歲輸萬石民困於輸則又輦而致之河郾乃傍流爲大廩受粟寶而注諸牘民悅忘輸之勞改郾岳等州觀察使治虢時經月不答一人及蒞鄂則嚴法峻誅一不貸或問其故曰陝土瘠而民勞吾撫之不暇猶恐其擾鄂土沃而民剽雜以夷俗非用威莫能治政所以貴知變者也聞者服焉

柳仲鄧京兆華原人累遷太子賓客爲虢州刺史終天平節度使

陝縣志

卷十五

八

薛 萃河中寶鼎人以長安令遷虢州刺史所居守法度務在愛人治身儉薄所衣綠袍更十年至緋乃易終贈工部尙書

錢 徽字蔚章以太子右率府出爲虢州刺史入爲禮部侍郎復刺江州終吏部尙書贈右僕射

崔 衍字著深州安平人天寶末擢明經後歷虢州刺史奏虢居陝華間所部當郵傳劇道悉多山田賦稅煩重倍於他處裴延齡止之衍不聽復奏歲旱民流租額不減民無生理德宗哀其迫切詔度支爲減青苗錢

令狐楚華原人陝虢觀察使後爲河南尹有治聲百姓愛之拜東郡留守

元 稹字微之河內人元和元年對策第一授左拾遺性明銳遇事輒舉拜監察御史失中人意貶虢州長史稹長於詩與白居易名相埒天下傳諷號元和體

李商隱字義山河內人進士第調宏農尉以活獄忤觀察使孫簡將罷去會姚合代簡諭使還官又試拔萃中選王茂元鎮河陽愛其才表掌書記初爲文瑰邁奇古及在令狐楚府楚本工章奏因授其學商隱儷偶長短而繁縟過之時溫廷筠段成式俱用是相誇號三十六體

王 建舉進士太和中爲陝州司馬工樂府歌行思遠格幽宮詞百絕有集傳於世池考
衛次公字從周河東人陝虢都防禦觀察使請蠲橫租錢三百萬

王 質字華卿五世祖通爲隋大儒少孤力耕養母講學不倦舉進士中甲科文宗朝爲
虢州刺史李德裕素器之質清白畏慎爲政必究風俗所至有惠愛雖與德裕厚善而中
立自將不爲黨

劉伯芻字紫芝以給事中補虢州刺史有三堂二十一咏終工部尙書

韋 溫字宏育文宗朝陝虢觀察使民當輸租而麥未熟吏白督之溫曰使民貨田中穗
以供賦可乎爲緩期而賦辦

崔 咸字重易博陵人敬宗朝陝虢觀察使晝與賓僚痛飲夜閱簿領剖判決斷無毫釐
差胥吏服以爲神

高少逸由給事中出爲陝虢觀察使中人責硤石驛吏供餅惡鞭之少逸封餅以聞宣宗
怒召使者責曰山谷間是餅豈易具耶謫隸恭陵中人皆歛手以兵部尙書致仕卒

裴 向字素仁聞喜人宰相遵慶子陝虢觀察使歷官仁愛推利及人能以學行持門戶
崔 碭字東標武宗時尹河南嘗辨冤獄淫潦遽霽都民相與歌舞於道徙陝虢觀察使

陝縣志

卷十五

九

李 荆雍王繪之後爲陝州左司馬曰是官無所職吾不以吏事受責足矣潔白奮勵士
大夫頌之

高 弁雷澤人舉進士累官御史謫知陝州境內大治天性孝友爲文章祖六經及孟子
有帝則三篇傳世

按唐自中葉以後蕃鎮跋扈魏博恆趙累世反側以迄於亡顧分陝爲雄郡而卒未聞
有據地以抗命者周召之遺化所被遠矣

五代

沈 斌字安時徐州下邳人事唐以平蜀功拜虢州刺史又轉祁州死於契丹之難

魚崇諒字仲益由岐居陝自幼能文弱冠辟後唐明宗相州從事清泰初任陝州司馬歷
仕晉漢周入宋迄太祖朝不起太宗卽位詔授金紫光祿大夫兵部侍郎致仕

王 凝齊間人爲虢州司戶參軍卒於官妻李氏攜子負骸以歸過開封逆旅主人不納
牽其臂出之李氏仰天慟曰我爲婦人不能守節而此臂爲人執耶不可以一臂並污吾
身卽引斧斷其臂路人爲之泣下上聞爲施藥厚卹之而荅其主人

按歐陽公五代史載李氏事於馮道傳後蓋以世亂之極而有婦人能自守其身於以

見天理民彝之不可泯正所以愧此老鬚眉也

宋

韓丕字太簡華州人太平興國舉進士雍熙二年以虞部郎中出知虢州清介自持人稱長者終禮部侍郎

李穆字孟雍開封陽武人陝州司馬咸秩之子登顯德進士宋初通判洋州剖決滯訟庭無留獄移陝州坐調郡租輸河南不卽應命免官太平興國八年擢左諫議大夫參知政事

司馬池字知中夏縣人溫公父也知杭州爲張從革所劾降知虢州旣而從革賊露或謂可以報矣池曰吾不爲也人服其度終知晉州

杜審進昭憲皇太后兄乾德二年知陝州鎮陝二十餘年勸農敦本民庶便之雖居節制無驕矜之色人推其醇愿追封京兆郡王

吳則禮字子副號北湖富川人以直祕閣知虢州有北湖集十卷長短句一卷

張益之字景山以戶部副使出知虢州所至有聲終光祿卿

滕宗諒字子京河南人知慶州爲梁堅所劾降知虢州

陝縣志

卷十五

十

梁顥字太素須城人以右拾遺貶虢州參軍顥閨門雍睦與人交久而無改士夫多之

趙湘字巨源華州人爲集賢學士徙知虢州廉問疾苦按不稱職者人皆稱之

師頴字霄遠內黃人知陝州簡靜爲治時西鄙用兵餉道所出軍士多亡哨聚爲盜頴嚴其巡捕盜越他境祀名宦

寇準字平仲下邳人以前宰相守陝大臣蒞郡率以位望自高不肯留心民事準盡心郡務處士魏野居東郊準時與遊衍賦咏唱酬故野詩有世情冷暖猶分別何必區區較異同若得長將紅袖拂也應勝似碧紗籠之句祀名宦

查道字湛然休甯人知虢州會蝗災出廩賑救給麥種民賴以濟所至務寬恕胥吏有過未嘗笞罰民逋或出已錢償之嘗出按部從者摘路旁棗以獻道計值掛錢於樹而去狄棐字輔之長沙人舉進士知陝州爲政豈弟不爲表暴後知河南府語却中貴退謂所親曰吾湘潭一寒士官居侍從可以老而自污耶其介如此

李若穀字子淵徐州豐人知陝州盜聚青灰山遣牙吏招降之治民多智慮豈弟愛人故去後多見思

宋璫字寶臣渭南人乾德中及第端拱初知陝州性清簡歷官三十年未嘗問家事好

寫書常聚至數千卷以貽子孫曰使不忘本也

李昭邁字逢吉三知陝州立廟祀唐刺史長孫操

李及之鄆城人知陝州吏事清白以稱職聞官至大中大夫撰君臣龜鑑八十卷

向傳範字仲模神宗皇后從祖知陝州仁宗賜詩以寵其行平生歷官有能稱葬族人在殯者六十四喪

劉航魏人第進士爲政寬猛不同而皆治王師西征倉卒軍興餽餉切急縣令佐至荷校督民民多棄田廬或至自盡航獨期會如平日事更以辦終太僕卿

張去華以郎中知陝州愛養元元急於稼穡獻大政要錄三十篇上嘉賜甚厚因留不遣孫唐卿景祐中通判陝州於吏事若素習民有母再適人而死及葬父遂盜母喪以祔有司論以法唐卿曰是知有孝而不知有法乃釋之入名宦

張舜民爲御史論文彥博不當遣使夏國降通判虢州諫官七人救之章數十上不得

吳育字春卿達安人少奇穎博學試禮部第一累官資政殿學士兼翰林侍讀學士知陝州惠洽人心性明斷所至作條教簡疎易行而不可犯遇事不妄發發卽人不能撓論辨明白使人聽之不疑卒贈吏部尙書諡正肅祀名宦

陝縣志

卷十五

十一

靳懷德博州高唐人祥符間知陝州悉心撫字頗著政績

吳克育弟亦知陝州政務守靜神宗朝爲宰乞詔還司馬光呂公著韓維蘇頌薦孫覺李常程顯等數十人

趙良規知陝州歲饑百姓請閣殘稅二分爲官伐芟以給河埽咸以爲須報乃可行良規檄縣遂行而以擅命自劾

呂大忠字進伯藍田人知陝州持身清謹爲政慈愛發奸摘伏盜賊知畏後以寶文閣直學士知渭同二州祀名宦

范祖禹字純甫華陽縣人第進士授校書郎出知陝州政惠及人人懷慕之官至翰林學士祖禹平居恂恂口不言人過至遇事別白是非不少借隱蘇軾稱爲講官第一有帝學唐鑑政典傳世祀名宦

楊仲元字舜民管城人第進士知虢州進光祿卿改中散大夫入官五十年未嘗以私怒加人法有兩比必傳經典曰吾以是報國也

游師雄字景叔武功人學於張載第進士知陝州師雄慷慨豪邁有志事功朝廷用不盡其材

黃 實字師是陳州人章惇之甥登進士歷遷京東河北轉運副使惇罷林希言其在陳與蘇轍友善兩女皆嫁軾子所爲不正不宜用哲宗命知陝州爲人孝友敦睦以內行稱任伯雨字德翁眉山人自幼已矯然不羣中進士第累遷右正言首擊章惇蔡卞並欲劾曾布布覺之徙爲度支員外郎尋知虢州黨事作削籍紹興初贈直龍圖閣加諫議大夫淳熙中賜諡忠敏

李彥仙字少嚴本名孝忠其先甯州人後徙於鞏建炎初爲陝州石壕尉金人圍陝彥仙復之詔知陝州兼安撫使屢却金兵三年金婁宿自蒲解大入彥仙伏兵中條擊之復大潰尋金人併力攻城期必拔彥仙意氣如常潛使人縋而出焚其攻具金人愕而却城中食盡煮豆以啖而取汁自飲宿雅奇彥仙才陷以河南兵馬元帥彥仙立斬其使設鉤索日取鉤金人舂斫城上援兵不至守陴者傷殘亦盡城遂陷彥仙投河死年三十六金盡戕其家唯弟夔子毅得免建廟商州號忠烈官其子給田宅紹興九年宣撫周聿請卽陝州立廟名義烈後以商陝與金徙廟閩州諡忠威

按李彥仙守陝其浩氣英烈不亞張巡許遠之守睢陽顧世鮮知之者張許由韓愈以健筆褒揚之世多讀其文因以尊其人後代無昌黎而彥仙亦特書於史志之間文人

陝縣志

卷十五

十二

學士之著論所關不綦重乎

黃 震爲劉豫將守魏州來歸高宗南渡以震爲商虢陝州鎮撫使撫士有聲

趙叔憑宗室子建炎間爲陝州都監金人圍城援兵不至叔憑子官盧氏遺以書曰人臣當死國難况吾近屬可辱命耶遂與通判王濬職官劉效陳思道馮經李岳杜開縣令張玘等五十一人俱死無降者

謝 皋開封人爲虢州鎮撫使金兵陷城迫之降皋指腹曰此赤心耳自剖其心而死

按趙宋南渡微弱極矣顧諸人猶以節著不僅李若水能爲國死難也蓋自五星聚奎河洛諸大儒提倡正學理義之教素明故人不肯自污其關係世道豈不鉅哉

金

李獻能字欽叔河中人廷試第一人在翰苑凡十年以鎮南節度副使充河中經歷正大八年河中陷獨得一艘走陝州被召以道梗不能赴就權陝府行省左右司郎中軍變遇害欽叔文章行業過人處甚多而天下獨以其純孝爲不可及云

孫 鎮字安常絳州人高才博學嘗中省試魁承安二年五赴廷試賜第以陝令致仕年八十四卒有東坡樂府註歷代登科記行世

宗 浩字師孟宗室子陝州防禦同知察廉能第一元

趙道泰直隸金鄉人延祐六年知陝州視文風凋弊首捐俸爲僚屬倡學校一新其治民善政可紀者尤多

按胡元之世中原混亂而道泰能捐俸興學其亦異於俗吏之所爲矣

李與忠字季昌世洛陽人泰定二年除陝縣主薄修古穀陵便民路卽山儻功運轉巨石仆大木焚之隨山夷險順澗曲直使免齧足之患摧殘之苦當時蒙古軍百戶連偉撰文紀其事勤石今遺碑尙在惜字不完云

明

康茂才字壽卿蘄州人通經史事母至孝洪武初遷同知大都督事兼太子右率府使從大將軍經略中原取汴洛留守陝州規運饋餉造浮橋渡師招徠解絳諸州扼潼關秦兵不敢東向茂才善撫綏民立石頌德焉卒封蘄國公諡武康

聞人桂洪武二年任州治學宮城隍廟皆其建置

齊 禮陝西隆德人由監生任恩威並濟子孫皆登科第人以爲善政所致云

陝縣志

卷十五

十三

王雲鳳山西和順人由進士授禮部郎中賦性嚴察力詆宦寺謫知陝州問民疾苦興利祛害惟恐後州城乏水井深二百尺勸修復唐時長孫操廣濟渠日所受狀卽與剖白匹夫匹婦得言其情有勢豪謀利病民者必痛治之表賢者之閭講程朱之學斥佛老毀淫祠士民翕然頌服升陝西提學僉事見名宦言行錄

李 純直隸開州舉人寬仁愛人政清事簡猛虎爲災公作文禱之虎患遂息

王 宇麻城舉人吏事練達積穀三萬石至十一年旱賴其粟不死徙者萬計

閻 俸隴州舉人修學校築堤防創忠烈祠表節婦閭時池蓮生並蒂人僉以爲瑞

安 科太安州舉人崇學校節里甲讞獄多所平反然性剛毅不下權貴竟以謫官郡民詣闕奏留立碑志思

榮 恩字月泉山西太原舉人隆慶丙寅蒞任嚴明仁恕一毫不苟初欲修廟學適值歲稔次年大稔乃興工重脩升淮安同知未行卒無棺殮之具郡人思之祀召公祠

方 揚安徽歙縣人進士性耿介政尙體要力挽靡風作新士類修建皆有裨於民升南京戶部員外郎歷轉杭州府知府祀名宦

文羽麟四川涪州舉人豈弟溫恭不與物忤而是非臧否井然能鑒溫而理者也常言吾

生平不害人前程不傷人性命不蕩人家產後人思之越九年立祠以祀

趙 恆太原樂平人質直嚴明嶄然有清操升陝西鞏昌同知歷轉長蘆運使

朱萬邦蒲州舉人實心實政民間無擾

龍爲光勝縣舉人精明渾厚士民德之歷升雲南副使

吳夢周順天舉人敦厚嚴明政得大體

張天雅陝西涇陽舉人有惠政

王家賓漢陽舉人潔己愛民留心政務陝州舊志其重修手筆也

史記言字司直當塗舉人知陝州陝當賊衝記言出私財募士聘少室僧訓練之崇禎八年冬十一月流賊犯陝記言禦之斬數十級生擒二十餘人老獍憤率萬人攻城不克乘雪夜來襲而所練士方調他郡城遂陷記言縱火自焚兩僧掖之出曰死此何以自明乃越女墻下賊追獲之令降叱曰有死知州無降知州也遂被殺指揮李君賜殺數賊而死訓導王誠心里居教諭張敏行姚良弼指揮楊道泰阮我彊鎮撫陳三元均不屈死是月賊陷慮氏知縣白楹自刎記言贈光祿少卿餘贈卹有差

按明季闖賊蹂躪中原死難者多矣史知州倡義指揮訓導諸官相繼以死有明最重

陝縣志

卷十五

十四

氣節地方官守皆知自愛不獨崇禎皇帝身殉社稷也

陳道蘊廣東封川縣貢士官當牛馬二站抵兌外縣協濟一時稱便詳見掌故

張 璞山西猗氏貢士崇禎十四年任值陝屢遭寇災仍遣荒疫賦無所出申請止以見糧四千餘石上供民困稍蘇

清

巡道

張學林字念耕江蘇丹徒縣人乾隆五年由分守河北道調任特建尊經閣以行笈所攜之經史善本盡度閣中以餉多士其時知州龔崧林修理州志其中善例剪裁多取正於學林而蒐討之功爲多學林尤長於詩載於舊志者綺結珠連足瞻風雅云

諸以謙仁和進士先宰慮氏多惠政嘉慶初任州牧張漢潮寇慮氏聞警兼程至召客軍募勇士會勦於橫澗大破之以慮氏城郭不完捐銀二千兩畀慮氏令重修

廣隆同治元年觀察陝時值髮逆竄擾有回民數人詭言來城避賊門者盤查不得入州收欲納之隆恐係賊營間諜阻止之後回民爲賊所殺聲言何故誑吾來陝益信隆之先見夏秋賊兩次擾陝城賴隆無恙調張衛懷道父老攀轅泣涕恩德及人如此

尹耕雲江蘇進士同治三年任光緒元年復任察吏安民不憚艱鉅時值亢旱晉豫陝三省大饑耕雲宿羊角山累月露香夜禱因而致疾士民惜之

者 紳滿州廂紅旗人光緒十年任勵精圖治疾惡如仇會有清盜局之令信賞必罰盜風一戢革供帳積習巡方時儉從減甚捐俸修廣濟渠以興水利民稱頌不衰

鐵珊姓徐氏漢軍正白旗人咸豐初以筆帖式考充國史館校對官五年補理藩院筆帖式本紀書成議敘知縣十年統兵大臣勝保調赴軍營十一年以直隸山東防剿出力賞戴藍翎濮范一帶捻首劉占考等恃衆負隅勢張甚奉檄諭降者多被害鐵珊躬冒矢石抵其巢力陳順逆占考等降解其黨數萬敘功以直隸州知州選用並換花翎旋仍回國史館供職同治三年揀發甘肅以實錄黃綾本告成賞加知府四年署通渭縣知縣邑當孔道回氛四塞期月被圍者九鐵珊登陴守禦城卒以完時軍需浩穰日供糧萬斤民大困鐵珊規畫減其半及去任父老攀轅不令行乃單騎夜從間道去五年代理平番縣事六年署皋蘭縣所至輕賦役輯流亡除蠹胥修城堡以次畢舉經陝甘總督楊昌濬保以知府仍留甘肅補用穆圖善奏請破格錄用均報可未幾丁父憂復經穆圖善奏留攝中衛縣事督辦南路糧臺九年二月服闋時左宗棠奉命西征大軍雲集鐵珊運籌飛輓經

陝縣志

卷十五

十五

畫裕如十一年補寧夏府知府未蒞任調蘭州府創津貼法民德之舊制甘肅鄉試併於陝西舉行士子遠涉爲艱鐵珊議建貢院於蘭州條析分闈事宜上之左宗棠據以入告得旨下所司議行光緒元年署甘涼道所轄武威永昌鎮番三邑毘連中有一渠資以灌溉民爭水械鬪或傷或死不可究詰鐵珊爲開支渠別子母水設插其中立均水約輪日灌溉並勒碑紀其事民大悅爲立生祠渠上鐵珊又傭工牧羊三千取息給窮民之無告者府經歷受其成著爲例六年敘籌餉功加按察使銜八年俸滿命以道員選用十二年授河南河陝汝道問民疾苦擒巨盜李改李復岐等宣諸法陝州文教陵夷鐵珊建書院定課程士氣以振闔鄉北濱黃河南臨澗水鐵珊擬築石壩以殺水勢而運費無所出忽水發閘底鎮激湍中得巨石無數因以施工十六年夏五月大雨河水漲陝州南城不沒者數版居民大恐鐵珊乃以陝州石隄之役與闔工同時並舉畫監役作夜治簿書旣蒞事十月遂卒於官十七年建專祠

知州

劉世傑北直滄州進士順治五年由陝西隴右道守陝州仁政多端難以悉舉在任四年不罰民間片紙歷升沂州道

吳世英遼東蓋州人順治十三年由山西汾陽知縣守陝天資樸實廉靜寡慾在任三年未嘗苛罰陝舊志經明季兵燹被毀世英當勝朝草創招集耆老搜討遺逸纂修州志十二卷體例頗屬簡明後升淮安知府

劉芳顯山海衛人除荒徵熟愛周慮遠州治儀門下有碑記

邵 泃鹽山人移風易俗振興文教士民樂之

李朝柱臨汾人創建召南書院詳免河工差徭士民沾惠

周全功廂白旗漢軍貢生康熙四十三年由大同調守陝首修文廟以興學校繼因廣濟渠關係闔城民食久廢不修每公暇出郊相其斷續崩頽之處默識其高下闊狹籌度需費幾何乃召匠興工三載而後有成績可以與長孫操媲美皆自爲記勒諸石見文徵龔崧林武進人舉賢良方正乾隆十年由洛陽令陞任百廢具舉民不知勞對於文教尤爲注意陝志本太簡略崧林招致幕僚開局編纂對於歷史故實極有搜討又與巡道張學林榷商體例幾經研究成直隸州志十八卷後之續修者未能出於範圍云

杜 翊山東武定濱州人同治元年任時姜召凌自西來犯勢甚猖獗翊率衆防守靜以待援地方賴以無失

陝縣志

卷十五

十六

周仁壽湖北宜城進士同治六年任值髮捻蹂躪之後官民慘死者甚衆仁壽委紳衿採訪爲忠義節烈二冊使死者雖身膏原野不至與草木同腐其又補於風教者大矣又陝舊試院甚隘仁壽重修闢而廓之使士子風雨有庇見何金壽所撰碑記

嚴作霖浙江慈谿縣監生光緒六年由軍功保舉任時值饑饉之後地多荒蕪盜匪滋多胥役侵蝕而學校尤廢不堪理作霖秉性直爽遇事敢爲首下保甲之令使比戶不得窩匪除大小櫃濫派使費裁抑吏胥毋敢擾害鄉閭勤訪獄訟以伸民冤令民開墾荒地禁種罌粟勸植農桑民漸有生活又設立義學頒講聖諭而對於考試場規更嚴槍遞不得舞弊老儒兀煥動嘗作詩頌之屬邑靈寶牛莊田村爲水渠事積訟連年作霖親往查勘爲開渠使上流不得霸水該村民立祀尸祝之又豎碑南關題其額曰樂利無窮云

黃璟字小宋大興籍實廣東南海人歷任唐濬沈邱祥符知縣在祥符時有魯撫部下武員某橫行鄉閭璟密稟撫憲預伏壯士以東邀某略加問訊某直認不諱呼壯士捕而誅之省會肅然光緒十八年由禹州調升陝州直隸州知州陝爲秦豫孔道兵差絡繹最爲煩苦璟釐定章程使不濫支頻年山東窮民往隴西開種荒地者甚夥歲暮東歸每爲行旅之害璟設法令其出境又培植文教由會興鎮鹽商酌提規餘辦三門書院捐貲刻兀

子炳先生備質錄風示多士州署後有艤棧園頗擅名勝璟與道尹沈守廉均好宏獎風流凡過客能詩文者輒款留置酒高會觴咏其間傳爲雅事病前任趙希曾修志未盡完備璟又委幕友暨士紳採訪補輯禮樂職官兵防人物等爲續志十卷當庚子兩宮西巡暨辛丑回鑾時璟在潼關襄贊差務頗能幹旋使事辦而民不擾理煩治劇最負長才璟雖起身戎馬而宦達以後頗留意於書法詩章到處勒題匾聯字摹八分蒼勁入古著有四百三十二峯草堂集宦遊所歷皆託吟咏以紀之老而致仕閒居梁垣在宋門外及龍亭築花園數處娛情詩酒自號鐵石道人創因利局使貧民營業者皆得有所取資其慈善又普及無窮焉

岳廷楷字揆章宣統二年任次年武昌起義陝西響應清廷發兵抵禦戰於潼關屢敗退陝當東西孔道金戈鐵馬相望於途飛芻輓粟絡繹不絕凡一切差款廷楷呈請由正稅開支於釐金項下截抵陝民毫無差徭負擔而人未之知也迨秦軍東下抵陝廷楷隨統領趙倜東走未幾秦軍敗於觀音堂趙倜率軍西上偕廷楷至仍任原職民國元年十二月去職民感其德於城東街鐵公祠左建立生祠今縣立小學校址是也

劉國楨字幹臣河南沈邱人曾任馮玉祥軍軍法司司長執法如山民國十七年七月六

陝縣志

卷十五

十七

日上峯以陝屬巖邑久爲匪藪難治委長縣篆兼豫西副執法維時歲遭大稔土匪蠭起近山一帶私鬥成風白晝殺人官吏莫可如何國楨詰奸除暴不動聲色嘗不用兵力而擒獲渠魁十餘名均梟首示衆自是境內肅然山東慈善家汪波止發粟賑災原擬在靈寶設立粥廠及過陝與國楨晤談遂傾心焉乃就陝城東火神廟煮粥散放多所全活國楨爲人誠實儉樸望之若無能而臨事當機立斷咸共服其神明在任半年吏不催租過往兵差均按章供給民咸感戴去之日百姓扶老攜幼集署挽留國楨陽爲安慰伺間而行聞去任後從事商業囊中資嘗出而散給最苦無告者日無慮數十元而徒步以行未嘗乘車馬布衣蔬食晏如也求人於今之世豈可多覲哉

馬雙慶字餘禰禹縣人河南公立法政專門學校及高等警察正科畢業曾任封邱新蔡等縣警察所長河南全省警務處科員省長公署警備股主任河南全省自治籌備處科長靈寶縣長民國二十年九月任陝縣縣長時各區民團擁兵自固跋扈跳梁雙慶以政治手腕推誠曉諭卒使之各就範圍地方又安二十一年教育特捐被山陝商人呈控取消時該項特捐爲教育專款驟行取消全縣教育立行停頓教界人士起而抗爭雙慶力持舊議不令停征卒經省方另改辦法仍予維持全縣教育始賴以繼續辦理後去任仍

因教育特捐事受重大處分不顧也陝人士聞之殊爲感憤益歌去思焉
州佐雜教職

明

劉肅涿州人陝州同知性質實寡言笑居官清勤雖公廷手不釋卷後升戶部員外郎
儀泰高密人初任禮科給事中後調判官尋升陝州同知惠政愛民尤注意學校甫二
載卒於官

衛璣陽城吏員宏治中升陝州同知勤於案牘人至今稱焉

張盛治江南豐縣人由恩選博學宏辭不染世勢捐俸新兩廡神主並賑貧乏有枌榆社
集行世升太平府教授

吳茂徵浙江貢生陝州判官崇禎十四年流寇入城死之生員郭開葬於大南關舊寺之
西有碣

胡之豹東陽人由吏員任陝州吏目崇禎十一年任十四年流寇入城死焉郭開葬於州
判吳公瑩次
清

陝縣志

卷十五

十八

吉祥商邱人州學正嚴氣正性文風丕振

孟桓睢州人訓導升學廣額整飭士習

馬毓驥錦屏人號墨崖清光緒年間任陝州學正十有餘載爲人和易好談諧接引後進
如恐或失每學使按臨謁廟講書必與同寅商議擇諸生之翹楚善辨論者派令宣講逐
層翻駁推陳出新一時聽者多爲之聳動陝志自乾隆十二年龔牧修後歷百四十餘年
亟待增補光緒十六年玉川趙希曾任知州奉藩憲檄修志委儒學以採訪之役毓驥命
士子分路搜羅而自總其成乃甫脫稿而趙牧以丁艱去繼任蕭山孔廣聰急欲刊行委
儒學校正又特立文治一門對於廟祀禮樂學校特加詳焉乃功在半途而孔又以事交
卸泊南海黃環接署而始得告竣官經三任時歷數年而毓驥始終其事以底於成其參
贊之益多矣於今耆老猶能道其令名云